

**Imarsiornerup isumannaatsuunissaa pillugu inatsisit allannguutaasa Kalaallit Nunaannut atuutilersinnerinut peqqussummut Namminersorlutik Oqartussat oqaaseqaatissaat pillugu Inatsisartut aalajangiiffigisassaattut siunnersuut**  
(*Saqqummiussisoq: Ineqarnermut, Attaveqarnermut Angallanermullu Naalakkersuisoq*)

**pillugu**

**Sanaartornermut Avatangiisinullu ataatsimiititaliap**

**ISUMALIUTISSIISSUTAA.**

**Siunnersuutip aappassaaneerneqarnerani saqqummiunneqartoq.**

Ataatsimiititaliap suliarinninnerani ilaasortat uku peqataapput:

Inatsisartunut ilaasortaq Naaja Nathanielsen, Inuit Ataqatigiit, Siulittaasok  
Inatsisartunut ilaasortaq Justus Hansen, Demokrateer, Siulittaasup tullia  
Inatsisartunut ilaasortaq Storm Ludvigsen, Inuit Ataqatigiit  
Inatsisartunut ilaasortaq Knud Fleischer, Kattusseqatigiit Partiiat  
Inatsisartunut ilaasortaq Malik Berthelsen, Siumut  
Inatsisartunut ilaasortaq Anders Olsen, Siumut  
Inatsisartunut ilaasortaq Kim Kielsen, Siumut

Ulloq 18. april 2012 UPA 2012-mi siullermeerneqarnerata kingorna Ataatsimiititaliap siunnersuut misissorpaa, matumuunakkullu Inatsisartunut naliligassanngorlugu aalajangiinissamut tunngavissatut isumaliutersuutini saqqummiullugu.

**Siunnersuutip imaa aamma siunertaa**

Peqqusutikkut imarsiornerup isumannaatsuunissaanik inatsimmi inatsisikkut allannguinerit tallimat kingullit Kalaallit Nunaannut atortinneqalissapput. §§-t 24 aamma 29 Kalaallit Nunaannut immikkut pingaaruteqartuupput. § 24 aalisariutinik misissuineri akiliisarnermut maleruagassanik allannguinerimik inatsisitigut tunngavissatut aalajangersagartaqarpoq, taamaalilluni piffissani aalajangersimasuni aalisariutinik misissuisarnernut atuisut akiliuteqartarnissaanik inatsisitigut tunngaviliisoqarluni. § 29 imigassartorluni imaani angalasarnermut atatillugu maleruagassanik sukannererusunik aalajangiisinnaanermut inatsisitigut tunngaviliivoq. Ilaatigut angallatit sunngiffimmi atorpeqartartut tamarmik imigassartorsimalluni imaatigut angalaneq pillugu maleruagassanut ilaatinneqarnissaat pillugu

maleruagassanik aalajangersaasoqarsinnaavoq, kiisalu promillemut killissarititaasut umiarsuarmi issimasunut tamanut atuutsinneqassasut.

### **Siunnersuutip Inatsisartuni siullermeerneqarnera**

Siunnersuut partiinit ataatsimut isigalugu iluarisimaarneqarpoq, isumaqatigineqarporlu imigissartorsimalluni imaani angalanermi maleruagassat sukaterneqassaut. Siunnersuutip aamma ataatsimiititaliami suliarineqartussatut innersuunneqarnissaa siamasissumik isumaqatigineqarpoq. Ataatsimiittarfimmi isummersornermi ilaatigut imigassartorsimalluni imaani angalasarnermi ilaasut aamma maleruagassanut ilaatinneqarnissaannik siunnersuut kinguneqassanersoq ataatsimiititaliamut innersuussinermut tunngaviuvoq.

### **Tusarniaanermi akissutit**

Tusarniaanermi akissutit inatsisissatut siunnersuummut tapiliunneqarput, tamannalu Inatsisartut Siulittaasoqarfiannit ilusiliinissamut piumasaqaatinut naapertuuppoq. Ataatsimiititaliap paasivaa, tusarniaanermi akissuteqarnissamut uku kaammattorneqarsimasut: Imarsiornermut ataatsimiititaliaq, Aalisarnermut, Piniarnermut Nunalerinermullu Naalakkersuisoqarfik, Aningaasaqarnermut Naalakkersuisoqarfik, Ineqarnermut, Attaveqarnermut Angallanermullu Naalakkersuisoqarfik kommunillu. Kalaallit Nunaanni politiit Imarsiornermut ataatsimiititaliami ilaasortatut siunnersuummut oqaaseqaatitik saqqummiussimavaat. Ataatsimiititaliap maluginiarpaq, aalajangiiffigisassatut siunnersuummi § 32-p nutaamik ilusilerneqarnissaanut politiit kissaatigisaat akuersaarneqarsimasoq, taamaallillu immikkoortut inatsisitigut taamaallaat tunngasuteqartut ataatsimoortinneqarlutik. Kalaallit Nunaata imartaani imagassartorsimalluni imaani angalanermi immikkut maleruagassiortoqassappat, tusarniarneqarnissamut politiit aamma qinnuteqarsimapput, tamannalu tusarniaanermi allakkiaq aalajangiiffigisassatut siunnersuummut atatillugu suliarineqarsimasoq naapertorlugu akuersaarneqarpoq. Ataatsimiititaliaq tusarniaanermi akissutinut annertunerusumik oqaaseqaateqarnissamut pissutissaqarsimangilaq.

### **Ineqarnermut, Attaveqarnermut Angallanermullu Naalakkersuisumit saaffiginnissutit**

Siullermeerinerup kingorna Ineqarnermut, Attaveqarnermut Angallanermullu Naalakkersuisumit allakkamik 23. april 2012 ullulernerqartumik Ataatsimiititaliaq tigusaqarpoq, taanna siunnersuummut itisiliisumik nassuiaatitaqarpoq. Allakkap assilineru isumaliutissiissummut uunga **ilannugsaq 1**-tut tapiliunneqarpoq. Ulloq 30. april 2012 Ataatsimiititaliap sulinerata nalaani Ineqarnermut, Attaveqarnermut Angallanermullu Naalakkersuisoqarfimmit Imarsiornermut Aqutsisoqarfimmut allakkap assilineranik Ataatsimiititaliaq aamma tigusaqarpoq. Allakkami Ineqarnermut, Attaveqarnermut Angallanermullu Naalakkersuisoqarfiup Imarsiornermut Aqutsisoqarfik nalileeqquaa, taamanikkut Naalakkersuisut kissaatigisaanut sanilliullugu aaqquissuussinermik sukanninnginnerusumik eqquassinissamut inatsimmut nassuiaatit akornutaassannginnerusut. Imarsiornermut Aqutsisoqarfimmut allagaq isumaliutissiissummut uunga **ilannugsaq 2**-tut

tapiliunneqarpoq. Kiisalu ulloq 3. maj 2012 Imarsiornermut Aqutsisoqarfimmit akissutip assilinerata Ataatsimiititaliap tiguaa, taannalu isumaliutissiisummut uunga **ilannugsaq 3**-tut tapiliunneqarpoq.

### **Ataatsimiititaliap siunnersuummik suliaqarnera**

#### **Piffissani aalajangersimasuni aalisariutinik misissuisarneq**

Maleruagassat atuuttut malillugit umiarsuit nutaatut aamma allannorsarlugit sananeqarnerannut atatillugu misissorneqartartussaapput. Aamma sioqqutsisumik nalunaaruteqaqqaarani misissuiniarluni ornigunnikkut misissuisoqartarpoq. Misissuinerit taakkua ullumikkut atuisunut akilersinneqartanngillat. Peqqussutikkut § 24-imi atuisut akiliuteqarfigisaannik aalisariutinik piffissani aalajangersimasuni misissuisoqartalernissaanut inatsisitigut tunngavissiisoqassaaq. Ineqarnermut, Attaveqarnermut Angallanermullu Naalackersuisup allaga malillugu (**ilannugsaq 1**) taamatut misissuineq minnerpaamik tuusintit koruunialunnik akeqartussaassaaq. Kisiannili Ataatsimiititaliap paasivaa, peqqussut imminermini aalisarnermik inuussutisarsiteqartunut annertunerusumik aningaasartuuteqarfiussanngitsoq. Peqqussutikkut taamaallaat aalisariutinik piffissani aalajangersimasuni misissuisarnerni atuisunik akiliisitsisalernissaq periarfissaalerpoq, taamaattoqassappallu tamanna Imarsiornermut Aqutsisoqarfik suleqatigalugu pissaaq, tamatumunngalu atatillugu soqutigisallit naleqquttut tusarniarneqassapput.

#### **Imigassartorsimalluni imaani angalaneq**

§ 29 a, imm. 6-ip kingunerissavaa, imigassartorsimalluni imaani angalaneq pillugu allaffissornikkut sukannernerusumik aalajangersaasinnaaneq inatsisitigut tunngavissaqalissammat. Siullermik angallatinut sunngiffimmi atorneqartartunut qanorluunniit angitigisunut promillemut killissarititaasut atussasut allaffissornikkut maleruagassiorneqarsinnaassaaq. Aappaattut promillemut killissarititaasut angallammiittunut tamanut atuuttussanngorlugit annertusineqarnissaanik maleruagassiorneqarsinnaavoq. Inatsisissatut siunnersuummut 2009/1 LSF100-mut nassuiaatini takuneqarsinnaavoq, maleruagassat atuutilernerisa kingunerissagaat, maleruagassat angallatinut sunngiffimmi atorneqartartartunut tamanut atuutissasut. Taamaattorli Ineqarnermut, Attaveqarnermut Angallanermullu Naalackersuisup 23. april 2012 allakkamini taavaa, promillet killissarititaasut aalajangersimasut angallatinut sunngiffimmi atorneqartartunut motorillinnut taamaallaat atuutissasut sulissutigineqartoq, tamannalu Imarsiornermut Aqutsisoqarfimmit allakkami (**ilannugsaq 2**) aamma uppersarneqarpoq. Taamaalluni qajarissat, qaannat tissiartaatillillu minnerusut promillemut killissarititaasunut pineqanngillat. Inunnut promilleliinermut killissarititaasunut ilaatinneqartunut atatillugu inatsimmut nassuiaatini takuneqarsinnaavoq, promilleliinermut killissarititaasut ilaasunut tamanut atuuttussanngorlugit maleruagassiorneqartassasooq. Taamaattorli Ataatsimiititaliamut allakkani (**ilannugsaq 1**) aamma Imarsiornermut Aqutsisoqarfimmut allakkani takuneqarsinnaavoq,

Kalaallit Nunaanni promilleliinermut killissarititaasut inunnut taakkununnga Danmarkimisulli pineqartunut ilaatinneqassasoq sulissutigineqartoq, tamatumalu kingunerissagaa, maleruagassat ilaasunut aamma atuutsinneqartussatut annertusineqassanngitsut.

Taamaalilluni Ataatsimiititaliami suliarinninnerup nalaani paasissutissat tiguneqartut tunuliaqutaralugit (**ilanngussaq 1,2,3**) Ataatsimiititaliap paasivaa, Kalaallit Nunaanni imartani angalanermi uku atuutilersinneqarnissat sulissutigineqartoq:

1. Imigissartorsimalluni imaani angalanermut maleruagassat umiarsuarmik ingerlatsisumut imaluunniit isumannaallisaanermut annertuumik pingaarutilimmik atorfeqartumut umiarsuarmi sulisumut atuutsinneqartut.
2. Promilleliinermut killiliineq angallatinut sunngiffimmi atorneqartartunut motoorimik ingerlatilinnut tamanut atuuttoq.
3. Promilleliinermut killiliineq angallatinut umiarsualivimmi pitussimasunut atuutinngitsoq.
4. Promilleliinermut killiliineq qajarissanut, qaannanut aamma tissiartaatilinnut mikinernut atuutinngitsoq.

Taamaalilluni maleruagassanik sukaterinermi pineqartoq tassatuaavoq, angallatit motoorimik ingerlatillit sunngiffimmi atorneqartartut imigassartorsimalluni imaani angalanermut maleruagassanut, taamaalillunilu promilleliinermut aalajangersimasumik killiliinermut ilanngunneqarnerat. Ataatsimiititaliap naammagisimaarlugu oqaatigissavaa, angallatinut sunngiffimmi atorneqartartunut maleruagassat sukaterneqarmata, kiisalu imigassartorsimalluni imaani angalanermut maleruagassat ilaasunut atuuttussanngorlugit annertusineqassanngimmata.

Ataatsimiititaliap paasisinnaavaa, qulaani taaneqartutut Imarsiornermut Aqutsisoqarfiup ilanngussaq 3 malillugu uppersarmagu maleruagassat timalernissaannut taamatut sulissuteqartoqartoq. Ataatsimiititaliap aamma maluginiarpaa Imarsiornermut Aqutsisoqarfik akissummini ima allamat: ” *Imarsiornermut Aqutsisoqarfiup naliliinera malillugu inatsisissatut siunnersuummi nassuiaatit kingunerisaannik, imigassartorsimalluni imarsiortarnermut maleruagassanik, ilaatigut immikkoortuni pingaaruteqartuni maannakkut Namminersorlutik Oqartussat kissaatigisaannut uniuuttunik maleruagassanik atuutsitsisoqalissanngilaq. Inatsimmi aalajangersakkamik, maleruagassiorsinnaanermut inatsisitigut tunngavissamik atuutsitsilerfiusumik pilersitsinissarput pingaartissimavarput, tassanilu ersarissumik allassimassaaq, tamanna Namminersorlutik Oqartussanut isumaqatiginninniarnikkut pissasoq. Tassalu Imarsiornermut Aqutsisoqarfiup naliliinera malillugu aaqqissuussinermik, inatsisissatut siunnersuummut nassuiaatini taaneqartumit*

*sukanninnginnerusumik atuutsitsilerniarluni inatsisinut tunngavissanut aalajangersakkap atorneqarnissaa akornutissaqassanngilaq.”*

Taamaalilluni Ataatsimiititaliap paasivaa, imigassartorsimalluni imaani angalanermut maleruagassat inunnut umiarsuarmi sillimaniarnermut suliassaqtunut taamaallaat atuutsinneqarnissaat akornutissartaqanngitsoq. Tamatumunnga atatillugu Ataatsimiititaliap Imarsiornermut Aqutsisoqarfiup inassuteqaataa isumaqatigaa, oqaaseqaammi taaneqassasoq § 29 a, imm. 6, oqaaseqatigiinni siullerni aalajangersakkap peqqussummi ilaatinneqarnissaa kissaatigineqanngitsoq.

Siunnersuummut uunga atatillugu Ataatsimiititaliap isumaqarpoq pisariaqartoq uparuassallugu, siunnersuutip saqqummiunneqarneranut atatillugu § 29 a-p, matumanilu imigassartorsimalluni imaani angalanermi maleruagassat ilaasunut atuutsinneqarnissaasa annertusineqarnissaannik nassuiaateqarnermi qulartitsisoqalersimanera naammaginnanngilluinnarmat. Ataatsimiititaliap isumaqarpoq paatsoorneq pinngitsoorneqarsinnaagaluartoq siunnersuutip saqqummiunneqarnerani aalajangersakkap timitalerneqarnissaa qanoq pissanersoq Naalakkersuisunit naatsorsuutigineqarnersoq ersarissumik eqqortumillu nassuiarneqarsimasuuppat, tamatuma kingornatigut Ataatsimiititaliap paasissutissanik piniarnissaa pinani. Folketing-imi inatsisit akuerineqartut nassuiaataat taamaallaat qallunaatuujupput, taamaattumillu peqqussutitut atatillugu pingaaruteqarluinnarpoq, aalajangiiffigisassatut siunnersuutini aamma saqqummiussisutini maleruagassat qanoq kinguneqassanersut pillugit kiisalu qanoq timitalerneqarnissaat ersarissumik nassuiaatitaqarpata, taamaalilluni Inatsisartut aalajangiinissamut tunngavissamik pitsaassuseqarluartumik qulakkeerinniffigineqassammata. Tamatumunnga atatillugu Ataatsimiititaliap kaammattuutigissavaa Naalakkersuisut siunissami inatsisissatut aamma aalajangiiffigisassatut siunnersuutini saqqummiussinermi Inatsisartut suliarinninnissaanut atugassatut ersarissumik eqqortumillu siunnersuutip imarisai pillugit allaaserisanik saqqummiussaqtartassasut.

### **Siunnersuutip aningaasatigut allaffissornikkullu kingunissai**

Naalakkersuisut saqqummiussisutaanni siunnersuutip atuutilernerani innuttaasunut, inuussutissarsiorturnut imaluunniit pisortanut aningaasatigut kinguneqassanersoq allassimannngilaq. Tunngaviliussat takuneqarsinnaasut malillugit Ataatsimiititaliap isumaqarpoq allamik naliliinissamut pissutissaqanngitsoq. Siunnersuutip nassuiaatitaani nalinginnaasuni allassimavoq, siunnersuut akuerineqarpat aningaasatigut kinguneqassanngitsoq. Tunngaviliussat saqqummiunneqartut malillugit Ataatsimiititaliap isumaqarpoq allatut naliliinissaq pissutissaqanngitsoq. Taamaalilluni ataatsimiititaliap tatigaa, apeqqut taanna Naalakkersuisut sukumiisumik misissorsimagaat, aamma aningaasatigut

kingunerisinnaasat allat pilersinnaanngitsut. Naatsorsuutiginnngisamik pisortat aningaasiviinut annertunerusumik aningaasartuuteqarnissamik siunnersuutip kinguneqarnissaa malunnarsissagalarpat, aningaasartuutit tamakku aningaasaliissutaareersunit akilerneqartussaassapput, taamaattoqassappallu tamanna suliniutinut allanut annikilliliinermik kinguneqassaaq.

**Ataatsimiititaliap inassutai**

Ataatsimiititaliap isumaqatigiittup aalajangiiffigisassatut siunnersuutip akuerineqarnissaa **inassutigaa.**

Taamatut oqaaseqarluni isumaliutissiissummilu allassimasutut paasinnilluni Ataatsimiititaliap siunnersuut aappasaaniigassanngortippaa.

---

Naaja Nathanielsen,  
Siulittaasoq

---

Kim Kielsen

---

Justus Hansen

---

Malik Berthelsen

---

Storm Ludvigsen

---

Anders Olsen

---

Knud Fleischer